

## *Waor of niet waor ?*

Dick van Bloemendaal, tekening Gerard Schut

*Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Veur julie un vraag, mar veur mien un weet, welke wel of niet waor bin.*

### *De lifter*


Bie de stalhouwerie van Garrit van Dam warkte Aort van Loo as stalknecht. Hie kos merakels best mit peerden umgaon en daarom kreeg hie van Garrit ut volste vertrouwen in ut warken mit de peerden. Hie liet um alles doen, ploegen en eggen op ut land, mar ok ut personenvervoer mit toeristen en op zondag karkgangers rieën was Aort zun wark. As dur iemand 'esturven was mos Aort ok mit de liekkoets rieën.

In de leste oorlogsjaoren was hie aordig benauwd um mit peerd en wagen over de weg te gaon want de engelse jagers vleugen vaak rond en die scheuten op alles wat mar beweug. As ut effen kos dan ging Aort ut liefst in ut donker de weg op want dan waren die tommies niet in de lucht. Hie was nargus bang vur mar an dat gedoe in ut duuster had hie toch wel un hekel. Op un harfstdag in november mos dur un liek op'ehaold worren in ut Pius ziekenhuus in Harderwiek.

Garrit had mit Aort of'espreuken dat hie dat ut beste in de avond kos doen en dus vertruk hie bie duuster mit de liekkoets naor 't Pieregesticht, zoas Aort dat neumde. Um ongeveer elf uur had Aort de kist mit ut liek in de koets en ging hie weer op Putten an. Dur stung un harde straffe wind en je kossen geen hand vur ogen zien, zo duuster was ut. Dur was geen mins an de weg en ongeveer bie Tonsel heurde hie gestommel achter in de liekkoets. Noen was Aort niet biegeleuvig mar wel un beetje

un bange drietert en hie schruk zo arg en wat moe'je dan? Hie prakkezeert nargus over en leit de zweep dur over en mit duuvel en geweld jaagt hie op Putten an.

Bie Armelo mos hie noodgedwungen ut weer kalm an doen, mar toen hie Armelo uut was ging de zweep dur weer over en mit un beste gang ging ut weer veerder, langs ut bliendegesticht, ut huus van Gaart Sok en net veurbie ut huus van Kees Gansefles



bie de Spreng dreide hie de Harderwiekerstraot op en dee hie ut wat kalmer an. Toen hie bie ut starfhuus kwam gooide hie vlug un

peerdedeken over de rug van ut dampende peerd en wou volk gaon haolen um de liekkist uut de koets te haolen. Krek toen hie bie de liekkoets vandaon liep keek hie nog effen achterum en zag un schim van de koets ofspringen en vort runnen. "Gleuende Marietje"zeit hie bie zun eigen (want vleuken dee hie nooit) "ut zal toch niet waar wezen dat ut liek vort is" en liekbleek klopt hie bie de minsen an de deur. Mit un paor man gaon ze naor de liekkoets en haolen de kist, die nog gewoon dicht zit, uut de koets.

In huus hen ze nog un kommetje suregaatkoffie 'edrunken en toen hen ze ut dur nog over 'ehad, dur is vast iemand in de koets 'eklommen die dat hele end van Harderwiek naor Putten niet het willen lopen. Zo zie je mar weer dat un stalknecht nog hele raore dingen kan meemaken.

+++